



## Iskoristiti hrvatska iskustva u pregovorima sa EU

Četvrtak, 28 juli 2011 11:42

Nezavisni istraživački centar Populari pokrenuo je projekt "Dobri susjedi", koji ima za cilj potaći konkretnu saradnju BiH i Republike Hrvatske u svrhu prenošenja hrvatskih iskustava u pretpristupnim pregovorima sa EU, te na najbolji način iskoristiti ta iskustva u Bosni i Hercegovini, izjavila je u razgovoru za Fenu direktorica Popularija Alida Vračić. Projekt je podržala Vlada Velike Britanije.

Vračić je podsjetila da je BiH potpisivanjem Sporazuma o stabilizaciji i pridruživanju (SAA) stupila u ugovorni odnos sa Europskom unijom i obavezala se ispuniti zahtjeve koje pred nju postavlja buduće članstvo.

- Iako je Vijeće ministara BiH, kao i većina kreatora politika u zemlji izrazilo svoju predanost tom procesu, institucije BiH tek moraju pokazati energičnost i odlučnost da se obaveze i ispune. Istovremeno, susjedna Republika Hrvatska je okončala pregovore na svim poglavljima i uskoro završava pristupni proces, navela je ona.

U tom procesu, koji je trajao više od šest godina, Hrvatska je morala osnažiti kapacitete svojih institucija, ovladati određenim vještinama i znanjima, te kompletirati brojne zadatke.

Vračić navodi da Popularijev projekat "Dobri susjedi" prepoznaje priliku da BiH, u ovoj ranoj fazi razgovora o EU obavezama, nauči o mnogim aspektima koje je Hrvatska već prošla, te procesima koje čekaju i BiH.

- Populari privodi kraju prvu fazu projekta, gdje smo nakon preliminarnog istraživanja i razgovora sa bh. zvaničnicima napravili procjenu gdje se BiH trenutno nalazi po pitanju različitih oblasti koje su pokrivena poglavljima EU zakonodavstva. Istovremeno, istražujemo kapacitete koje je Hrvatska imala na početku procesa, te korake koje je u toku pregovora morala napraviti, kazala je.

Na osnovu preliminarnih istraživanja u Populariju su odlučili da težiste stave na segmente iz poglavlja koja se tiču sigurnosti hrane i okoliša, na što će se i projekt u narednom periodu fokusirati.

- Konačni cilj je, naravno, prenijeti znanja i usmjeriti bh. institucije ka često tehničkim pitanjima. Kako projekt bude odmicao, u saradnji sa domaćim vlastima, želimo proizvesti dokumente usmjerene prema donosiocima odluka u BiH, a koji će objasniti detalje pretpristupnog procesa u dva odabrana poglavlja, te zadatke koje će BiH javna administracija biti dužna ispuniti tokom pregovora sa EU, rekla je Vračić.

Projekt će trajati do 2012.godine, kada će se organizirati i završni skup na kojem će se okupiti svi akteri u BiH koji će na najdirektniji način raditi na pregovorima o punom članstvu u EU.

(Fena)